



**Komunikadu Imprensa**  
**25 Novembru 2024**

**Autór judisiáriu sira Juridisaun Tribunál Baukau admite pena traballu afavor ba komunidadade nu'udar alternativa maibé presiza mekanizmu kontrolu atu aseguira ninia funsionamentu**

Autór judisiáriu sira Juridisaun Tribunál Baukau admite pena traballu afavor ba komunidadade nu'udar alternativa ida, maibé preukupa ho ninia efektividade, nune'e presiza mekanizmu kontrolu atu aseguira ninia funsionamentu. Pozisaun ne'e apresenta iha okaziaun diskusaun ho autór judisiáriu sira, ho tema **“Konsolidasaun Esforsu atu Prevene Violénsia Bazeia ba Jéneru liuhosi desizaun judisiál”**, ne'ebé realiza iha 20 Novembru 2024, iha Ótel Vitoria. Diskusaun ne'e envolve Juis, Prokuradór, Defensór Públiku, Advogadu Privadu, Xefe Polísia Investigasaun Kriminál Munisípiu Baukau, representante MSSI no parseiru sira hanesan Pradet no Uma Paz Baukau.

Atividade diskusaun ne'e ho objetivu atu apresenta rezultadu monitorizasaun JSMP nian iha tribunál judisiál primeira instánsia sira hotu relasiona ho tendénsia kazu sira iha tribunál no desizaun tribunál ba kazu sira ho natueza violénsia bazeia ba jéneru. Partikularmente tendénsia desizaun ba kazu violénsia doméstika okupa fatin aas liu iha tribunal sira hotu, no diskusaun ne'e foku ba pena hirak ne'ebé tribunál aplika, maibé la hatudu efeitu susesiva ka efeitu hata'uk atu reflète ba objetivu pena ka sentensa ne'ebé hatuur iha Kódigu Penál. Alende ne'e, apresenta mós survei nivel satisfasaun públiku relasiona ho funsionamentu setór justisa nian no esforsu sira kona-ba polítika kriminál ba alterasaun Kódigu Penál (KP) no Lei Kontra Violénsia Doméstika (LKVD) atu inkorpora kazu inestu nu'udar krime ho artigu espesifiku iha KP no krime relevante seluk ne'ebé seidak inklui iha LKVD atu konsidera hanesan krime públiku.

“Setor justisa, partikularmente tribunál tenke konsidera atu dezenvolve instrumentu institusionál propriu hodi avalia tendénsia hosi pena sira ne'ebé aplika. Ne'e inklui esplora modalidade pena hirak ne'ebé Kódigu Penál estabelese nu'udar alternativa bainhira pena sira seluk ne'ebé tribunál aplika la iha forsa koersiva atu vinkula no prodús efeitu ruma iha sosiedade”, dehan Sr. Casimiro dos Santos, Diretór Ezekutivu interinu JSMP.

JSMP fiar katak forum sira hanesan ne'e importante tebes atu komunika faktu deskobrementu sira ba autor judisariu no permite diskusaun aberta no direita hodi troka perspetiva no dialogu komunikativa hodi hametin esforsu ba prevene violensia bazeia ba jéneru liuhusi desizaun sira tribunál nian ba kazu violénsia doméstika.

Iha diskusaun ne'e, JSMP kontinua apresenta dados estatistika sira ne'ebe rekolla no tendénsia pena ka sentensa ne'ebé tribunál sira normalmente aplika ba kazu violénsia doméstika sira no subliña perspetiva JSMP kona-ba modalidade pena ne'ebé tuir loloos tribunal tenke esplora hanesan pena traballu afavor ba komunidadade bainhira pena sira ne'ebé antes ne'e tribunal aplika la produz efeitu ruma.

Juis Administradora Tribunál Judisiál Primeira Instánsia Baukau, Dra. Maria Modesta de A. Veira, hateten katak violénsia bazeia ba jéneru dadauk ne'e sai hanesan problema ne'ebé mak boot iha mundu tomak inklui Timor Leste no vítima maioria mak feto. Tanba ne'e ita hotu prezisa tau esforsu hamutuk hodi halo prevensaun ba VBJ. Dra. Viera mós manifesta ninia apresiasaun ba kontribuisaun JSMP durante ne'e liuhosi JSMP nia monitorizasaun sira iha tribunál no rekomendasaun sira hodi hadia di'ak liután serbisu no atendementu tribunál nian. Enkuantu juis sira seluk admite katak durante ne'e sira kuaze la aplika modalidade pena traballu afavor ba comunidade mesmu konsidera katak pena ne'e halo parte nu'udar pena prinsipal ne'ebé hatuur iha Kódigu Penál. Maibé atu aplika pena ne'e prezisa diploma komplementar atu regula mekanismu kontrola ba kondenadu bainhira hala'o hela pena ida ne'e.

Entretantu Ministériu Públiku no Defensór Públiku konkorda ho JSMP nia hanoin atu bele aplika pena afavor ba comunidade iha kazu violénsia doméstika sira hodi bele fó mós efeitu suasiva ka (*efek jera*) ba iha kondenadu sira no ba nu'udar prevensaun jeral ba comunidade.

Relasiona kona-ba survei nível satisfasaun públiku relasiona ho adiamentu prosesu juis sira defende katak la'os juis sira mak halo adiamentu sein razaun. Durante ne'e juis sira esforsu-an atu realiza julgamentu hotu-hotu maibé dala ruma parte intervenente sira balu la koopera hodi marka prezensa tuir orariu ne'ebé markadu ona. Nune'e tribunál tenke adia julgamentu tanba sein prezensa intervenente sira nian, jugamentu la bele la'o. Kestaun limitasaun rekursu umanus iha tribunál no prokuradór mós nu'udar fatór ida. Alende ne'e adiamentu akontese tanba movimentasaun judisiáriu ka mudansa ba juis sira hosi tribunál ida ba tribunál seluk, ida ne'e mak prejudika adiamentu ba julgamentu sira.

Iha parte seluk, kona-ba polítika krimínal ba alterasaun Kódigu Penál, juis sira konkorda atu bele iha provizaun espesífiku ba kazu inestu, maibé prezisa asegura atu lakuna sira ne'ebé sai dezafiu ba protesau ba vítima sira bele inkorpora hotu. Alende ne'e relasiona ho artigu 35 LKVD mós prezisa reeve atu inklui tán artigu seluk ne'ebé seidauk konsidera hanesan krime públiku.

Diskusaun ne'e realiza ho forma ida informál hanesan diskusaun ne'ebé antes ne'e realiza ona iha juridisau Oekusi no iha ambiente ida amigável no permite interasaun ativu entre autór judisiáriu no partisipante sira no atividade ne'e realiza ho apoiu hosi TAF – Nabilan.

Atu hetan informasaun kompletu favor kontaktu:

Casimiro dos Santos  
Diretór Ezekutivu Interinu JSMP  
Diresaun e-mail: [casimiro@jsmp.tl](mailto:casimiro@jsmp.tl)  
Telefone: (+670) 33238883 | 77257466  
Website: <https://jsmp.tl>  
[info@jsmp.tl](mailto:info@jsmp.tl)

